



ATASSUT INATSIARTUNI

ATASSUT

UKA 2013/105-2

Gerhardt Petersen

20.11.13

Siunnersuut uunga: Suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersup allanngortinnissaa pillugu Inatsisartut inatsisaat nr. xx, yy 2013-imeersoq (suliniutinut angisuunut inatsit)
(Inuussutissarsiornermut Aatsitassaqaqarnermullu Naalakkersuisoq)

Soorlu siunnersuutip matuma siullermeerneqaqarnerni ATASSUT-mit erseqqissaatigereerparput Nunatta suliffissuarujussuaqarfinngornissaa aatsitassarsiorfinngornissaalu ATASSUT-mit tamakkiisumik tapersersugarivarput.

Periarfissaq manna atorlugu Inatsisartut Inuussutissarsiornermut Ataatsimiititaliaat ATASSUT-mit qujaffigissavarput aappassaaneerinninnissap tungaanut isumaliutissiisummik sukumiisorujussuarmik Inatsisartunut saqqummiussinerat pillugu.

Atortut assartugassallu allat eqqarsaatigalugit siullermeerinninnermi ATASSUT-mit immikkut maluginiarparput tusarniaanermi akissutit ilaanni atortussat angallanneqaqarnernut atatillugu Royal Arctic Line A/S isumalluutigineqassasoq kissaatigineqarsimasoq, taamaattorli Naalakkersuisut tikkuarpaat RAL nunat tamalaat imartaani angallassinissamik misilittagaqannginnera aammalu taamak annertutigisumik angallassissalluni misilittagaqannginnera immiini killiliisoq.

Tassunga atatillugu ATASSUT-mit erseqqissaatigivarput neriututigigatsigu nunatsinni suliffeqarfiit annerit minnerillu tamarmik aammalumi assartugassanik ilaasunillu assartuussisartut nunatsinniittut atorluarniarneqaqarumaartut, matumani pingaartumik Royal Arctic Line A/S eqqarsaatigalugu.

Taamaattumik ATASSUT-mit nuannaarutigaarput Inuussutissarsiornermut Ataatsimiititaliap tungaanit Naalakkersuisunut kaammattuutiginnittoqarmat



ATASSUT INATSISARTUNI

suliniutitut angisuunut atatillugu assartuinnermi suliassani unammilleqatigiinnermi nalinginnaasumik atugassarititaasut malillugit neqerooruteqarnissamut RAL-ip sapinngisamik annertunerpaamik periarfissaqarnissaa Naalakkersuisunit sulissutigineqassasoq.

Royal Arctic Line A/S-ip sapinngisamik annertunerpaamik atorineqarnissaanik kissaateqarnerput aammalu Inuussutissarsiornermut Ataatsimiititaliap kaammattuutaa naqissuserneqarpoq, Royal Arctic Line A/S-ip tungaaniit sakortuumik Naalakkersuisut avoqqaarineqarmata, tassani aamma Royal Arctic Line A/S-ip tungaanit erseqqissarneqarluni suliniutitut angisuunut tunngatillugu umiarsuaatileqatigiiffiup suliassat kivissinnaasai suunersut.

Tassunga atatillugu ATASSUT-mit Naalakkersuisunit kaammattuutigissavarput isornartorsiuneq taanna pimoorullugu tiguneqassasoq piaarnerpaamillu ingerlatseqatigiiffiit nunatsinniittut, matumani pingaartumik Royal Arctic Line A/S suliniutitut angisuut pillugit oqaloqatigineqassasut, taamaaliornikkut suliniutitut angisuut timitalersorneqalertinnagit nunatsinni suliffeqarfiit nammassinnaasaat suliarisinnaasaallu suunersut sunaassusersineqareerniassammata.

Tamatuma saniatigut ATASSUT-mit nuannaarutigaarput Inuussutissarsiornermut Ataatsimiititaliap tungaanit sulinnermi akissaatillu tungaatigut atugassarititaasussat pillugit suliarsimammat, tassungalu atatillugu inatsisissamut allannguutissatut siunnersuummik saqqummiussimmata, taamaalilluni akissarsianit nerisaqarnermut ineqarnermullu sulisitsisut ilanngaassisinnaanerit qummut killilerneqarnissaa isumannaarneqartussanngorluni.

Taamatut oqaaseqaateqarluta, ATASSUT-mit naqissusissavarput Inuussutissarsiornermut Ataatsimiititaliap isumaliutissiissutaa, matumanilu aamma allannguutissatut siunnersuutaa tamakkiisumik tapersorsorsatigu,

taamatutaaq naatsorsuutigaarput matumani kaammattuuterput, tassalu ingerlatseqatigiiffiit nunatsinniittut piaarnerpaamik attavigineqassasut oqaloqatigineqassasullu Naalakkersuisunit malinneqassasoq.